

四庫全書

史部

欽定四庫全書

史部

山西通志卷六十四

詳校官監察御史_臣查善長

檢討_臣德生覆勘

總校官進士_臣朱 鈐

校對官助教_臣蔡 鎮

謄錄監生_臣諸澄鑑

欽定四庫全書

山西通志卷六十四

氏族一

古者諸侯以字為氏以謚為族官有世功則有官族
邑亦如之後世或氏於國於謚於官於爵於氏於居
於志於事者不一姓居上氏居下列代姓氏晉尤盛
於齊秦豫是故望隸晉郡邑胥載之又有望不隸晉
而其原本出於晉暨代北諸氏族尤著者亦具列焉

以附後魏官氏志唐宰相世系表之義志氏族

趙氏出自嬴姓顓頊裔孫伯益帝舜賜以嬴姓十三世
孫造父周穆王封於趙城因以為氏其地河東永安
縣是也六世孫奄父號公仲生叔帶去周仕晉文侯
五世孫夙晉獻公賜采邑於耿河東皮氏縣有耿鄉
是也夙生共孟共孟生衰字子餘諡曰成季成季十
八世孫嘉為代王後降於秦秦使嘉子公輔主西戎
西戎懷之號曰趙王世居隴西天水西縣 漢京兆

尹廣漢世居涿郡宋僖祖生長於燕卽其後也元

按扎爾永古特族人居雲中幼孤鞠於外大父卓裕勒嘉
謚為趙家因氏趙平章世延其後也

孫氏一出自媯姓武為吳將軍孫翬翬八世孫詢字會
宗安定太守詢曾孫福為太原太守遇赤眉之難遂
居太原中都

李氏咎繇為理氏裔孫理利貞之後趙郡李氏出自
秦司徒曇次子璣字伯衡秦太傅三子雲牧齊牧為

趙相封武安君始居趙郡趙納頓弱之間殺牧齊為
中山相亦家焉卽中山始祖也牧三子汨弘鮮汨秦
中大夫詹事生諒左車仲車左車趙廣武君生常伯
遐遐孫秉字世範潁川太守因徙家焉秉八世孫膺
子瑾避難復居趙雞田李氏本河南部落稽阿跌
之族良臣襲雞田州刺史子光進振武節度使賜姓
李弟光顏河東節度使守司徒兼侍中代北李氏
本沙陀部落姓朱邪氏執宜代北行營招撫使蔚州

刺史子赤心賜姓李附鄭王屬籍賜名國昌代北節度使檢校太尉

周氏明陽曲周莊懿瑄文端經父子賜諡瑄南京刑部尚書經太子太保禮部尚書

王氏出自姬姓周靈王太子晉子宗敬為司徒時人號曰王家因以為氏十五世孫翦秦大將軍生賁字典武陵侯生離字明武城侯二子元威元避秦亂遷於琅邪後家臨沂都鄉南仁里太原王氏出自離次子

威漢揚州刺史九世孫霸居太原晉陽後漢連聘不
至霸二十世孫澤雁門太守生昶魏司空京陵穆侯
昶五世孫緝散騎侍郎生慧龍後魏寧南將軍長社
穆侯孫瓊四子遵業廣業延業季和號四房王氏

韓愈王仲舒神道碑王氏皆王者之後在太原者為
姬姓春秋時王子成父敗狄有功因賜氏戴少年
王榮碑自翦至魏凡三十四代有昶自王昶父漢
雁門太守澤已有名稱昶又秀出綏亦著稱八葉繼

軌軒冕莫與為比焉 白居易王士寬墓誌翦為秦
將軍三世而生珣珣居太原故今為太原人又十九
代而生瓊 自王慧龍入魏國三世一身至瓊有四
子時人語曰英英濟濟王家兄弟 魏高祖置中正
從容謂郭祚曰并州中正卿家故應推王瓊也祚退
謂寮友曰瓊真偽今日未辨我家何為減之然此第
李冲吹噓之說爾 王勃倬彼我系詩倬彼我系出
自有周分疆錫杜派別支流居衛仕宋臣嬴相劉迺

武廼文或公或侯粵自太原播徂江滙自東旋西擇
木開宇田彼河曲家乎汾浦 國史補四姓滎陽鄭
岡頭盧澤底李士門崔皆為鼎甲太原王亦四姓之
匹而呼為釵鏤王家喻銀質而金飾 柳芳姓系錄論
今流俗獨以崔盧李鄭為四姓加太原王氏號五姓
王顏追樹十八代祖王卓神道碑後魏定氏族僉
以太原王為天下首姓故古會時諺有鼎蓋之名蓋
謂蓋海內甲族著姓也 太原王氏唐有大房王氏

第二房王氏河東王氏烏丸王氏汾州長史王氏

烏丸王氏霸長子殷後漢中山太守食邑初縣五世
孫允懋懋七世孫罔後魏度支尚書護烏丸校尉廣
陽侯因號烏丸王氏生神念 中山王氏亦出晉陽
後魏王叡封中山王號中山王氏 汾州長史王滿
亦太原晉陽人其後為播起 太原王氏世居初縣
後徙平州至縉從侯希逸南遷居河內溫縣子智興
宣武節度使守太傅雁門郡王 王望出太原周靈

王太子晉之後世傳晉登仙是王家太子遂稱王氏
又二十一望中河東乃天水等九望之一也殷王子
比干之後北海陳留乃齊王田和之後也 介子推
姓王名光

馮始平望一出上黨周文王十五子畢公高之後畢萬
封魏食采馮城因氏 馮跋傳畢萬之子孫食采馮
鄉 馮亭為韓上黨守入趙趙封為華陽君戰沒長
平宗族由是分散或留潞或在趙在趙者為官帥將

官帥將子為代相及秦滅六國而馮亭之後馮母擇馮去疾馮劫皆為秦將相焉漢馮唐卽代相子又潞馮奉世以良家子選為郎

陳

潁川

出自媯姓虞帝舜之後夏禹封舜子商均於虞

城三十二世孫遏父為周陶正武王妻以元女大姬生滿封之於陳賜姓媯以奉舜祀是為胡公九世孫厲公他生敬仲完奔齊以國為姓旣而食邑於田又為田氏陳媯姓也然伍員曰虞思妻之以二姚是

又為姚姓也蓋媯姓始於周姚姓自夏有之然則堯
賜舜姓賜以姚也謂為媯誤矣姚姓有虞國至商有
遂國未知虞存於商否至周則遂虞皆為姬姓國矣
而封胡公於陳自是陳稱媯不復言姚

衛

河東

羽音

周文王第八子康叔封於衛以國為氏

韓

南陽

韓氏出自姬姓晉穆侯潰少子曲沃桓叔成師

生武子萬食采韓原生定伯定伯生子輿子輿生獻

子厥從封遂為韓氏路史萬唐叔十一世孫杜預

以為出曲沃或以為成師之子俱妄 韓有韓何橫
俠罌言賈褐李呂及韓侯無忌公族韓褐韓籍韓嬰
韓信信都之氏

楊氏出自姬姓周宣王子尚父封為楊侯 路史楊侯
曾孫失國平王以賜晉封叔肸後氏為楊一云晉武
公子伯僑生文文生突羊舌大夫也又云晉之公族
食邑於羊舌凡三縣一曰銅鞮二曰楊氏三曰平陽
突生職職五子赤肸鮒虎季夙赤字伯華為銅鞮大

夫生子容肸字叔佃亦曰叔饗鮒字叔魚虎字叔熊
號羊舌四族叔向晉太傅食采楊氏其地平陽楊氏
縣是也叔向生伯石字食我以邑為氏號曰楊石黨
於初盈盈得罪於晉并滅羊舌氏叔向子孫逃於華
山仙谷遂居華陰楊氏有六唐叔虞之後封楊以
封為氏又周宣王子尚父封後為氏又周景王之後
又晉之公族食邑於羊舌凡三縣一曰楊氏楊弘
農唐叔虞之後伯僑自晉歸周封楊家食采於楊因

氏一云周宣王曾孫封為晉所滅其後為氏焉 楊
天水揚雄自序平陽別一族周宣王子尚父封為楊
侯 揚雄自序曰其先出自有周伯僑者以支庶初
食采於晉之揚因氏焉不知伯僑周何別也揚在河
汾之間周衰而揚氏或稱侯號曰揚侯會晉六卿爭
權韓魏趙興而范中行智伯弊當是時偁揚侯揚侯
逃於楚巫山因家焉漢興溯江上處巴江州揚季官
至廬江太守復溯江上處嶠山之陽曰郢自季至雄

五世而傳一子故雄無他揚于蜀 危素楊氏族譜
序予讀宋侍講學士無為楊公序其家譜分新昌院
淮南院蜀院閩院丹陽房滎陽房其先皆羊舌氏之
後而華陰最先盛矣 盛事錄楊公博以師傅位太
宰而子俊民以會魁歷提學太僕少卿俊卿武會試
第一至錦衣衛都指揮俊士舉進士餘蔭叙又二人

時俊民未
任尚書也

何廬江唐叔虞裔孫韓王安之後訛韓為何

呂

河東

羽音

呂氏出自姜姓炎帝裔孫為諸侯號共

工氏有地在弘農之間從孫伯夷佐堯掌禮使徧掌
四岳為諸侯伯號太岳又佐禹治水有功賜氏曰呂
封為呂侯呂者脅也謂能股肱心膂也其地蔡州新
蔡是也歷夏商世有國土周穆王時呂侯入為司寇
宣王世改呂為甫春秋時為強國所并而周武王時
呂尚號太公望封於齊十九世孫康公貸遷於海濱
康公七世孫禮奔秦為柱國少宰北平侯禮孫青以

令尹從漢高祖封陽信侯當康公未失國時呂氏子
孫先已散居韓魏齊魯之間後又徙東平壽張魏徐
州刺史萬年亭侯虔孫行鈞其後世居河東 柳宗
元嶺南節度判官呂恭墓誌呂氏世居河東至延之
始大

張氏出自姬姓張仲後裔事晉為大夫張侯生老老生
趙趙生駱至三卿分晉張氏仕韓後裔字避地居方
城四世孫華二子樟趙趙隨元帝南遷六世孫隆復

還河東後徙洛陽 路史韓哀侯少子嫗采平為平
氏嫗氏張氏灌氏 河東張氏本出晉司空華裔孫
吒子隋河東郡丞自范陽徙居河東猗氏

魏

鉅鹿

周文王第十五子封於畢曰畢公高裔孫畢萬

仕晉封魏後分晉以國氏焉 畢公高後國絕裔孫
萬為晉獻公大夫封於魏河中河西縣是也因為魏
氏萬生芒季生武子犇犇生悼子悼子生莊子
絳絳生羸羸生獻子舒舒生襄子曼多曼多生文子

須須生桓子桓子生文侯都都生武侯擊擊生惠王
瑩遷大梁 褚少孫三代系論平陽在河東晉地分
為魏國以詩言之亦可為周世

陶濟陽陶唐氏之後又虞思為周陶正以官為氏 陶

潛命子詩悠悠我祖爰有陶唐邈為虞賓歷世重光
御龍勤夏豕韋翼商穆穆司徒厥族以昌 柳芳姓

系錄論於事則巫乙匠陶氏 陶氏有三 宋翰林
承旨陶穀本姓唐避晉高祖諱改焉穀唐彥謙之孫

也

栢氏李翱栢良器神道碑栢氏系自有周叔虞封晉其
支子有受邑于伯為采地者因以為姓後世生宗宗
以直顯景公厲公之時三郤惡宗共譖殺之其客畢
陽以其子州犂奔楚于是改伯為栢及漢有鴻者由
議郎為魏郡守子孫家焉

竇

扶風

夏王相遭有窮之難后方娠出自竇後生少康

竇氏出自姒姓夏后氏帝相失國其妃有仍氏女

方娠逃出自竇奔歸有仍氏生子曰少康少康二子
曰杼曰龍留居有仍遂為竇氏龍六十九世孫鳴犢
為晉大夫葬常山及六卿分晉竇氏遂居平陽鳴犢
生仲仲八世孫充避秦之難徙清河

葛梁國風俗通葛天氏之後子孫氏焉夏時葛伯嬴國
也亦為葛氏河南官氏志賀葛氏改為葛氏

范氏高平帝堯裔孫劉氏累之後伊祁姓自虞以上為
陶唐氏夏為御龍氏商為豕韋氏周為唐杜氏周衰

奔晉為范氏

馬扶風嬴姓伯益之後趙王子趙奢封馬服君子孫氏
焉元馬祖常撰曾祖月合乃神道碑父錫禮吉思
為金鳳翔兵馬判官死節官名有馬因以立氏

苗氏出自芊姓楚鬬伯比曾孫賁皇奔晉晉侯與之苗
邑因以為氏其地河內軹縣南苗亭是也上黨長子
縣有苗襲夔苗東陽望一出上黨

鳳望出平陽

袁汝南陳胡公七代孫莊伯生轅濤塗以王父字為氏
後去車為袁或作爰 元姚燧延安兵馬總管袁湘
神道碑袁虞舜裔也舜生姚墟居媯汭子孫以地姚
姓以水媯姓以有天下之號則虞姓及周武封胡公
滿於陳以國陳姓以陳公謚又胡姓袁則肇於陳大
夫轅濤塗西京轅固生猶未省文至後漢太尉安而
下始為袁矣 河東袁氏本出陳郡智弘相高宗

柳

河東

商音

魯大夫展禽食邑於柳下以邑為氏秦

并天下柳氏遂遷於河東秦末有柳安即展禽裔

柳氏出自姬姓魯孝公子夷伯展孫無駭生禽字季
為魯士師諡曰惠食采於柳下遂姓柳氏楚滅魯仕
楚秦并天下柳氏遷於河東秦末柳下惠裔孫安始
居解縣安十四世孫軌晉吏部尚書生景猷晉侍中
二子耆耆太守號西眷耆子恭南徙汝潁遂仕江
表四世孫僧習與豫州刺史裴叔業據州歸於後魏
純平陽太守生卓晉永嘉中遷於襄陽四子輔怡傑

奮號東眷安孫隗齊相六世孫豐後漢光祿勳六世
孫軌二子耆純號東西眷耆宗元之先 柳宗元叔
父殿中侍御史府君墓版文柳氏之先自黃帝歷周
魯其著者無駭以字為展氏禽以食采為柳姓厥後
昌大世家河東 柳冕芳子字敬叔博學富文詞且
世史官父子並居集賢院

鮑上黨宮音 夏禹之後有鮑敬叔仕齊食采于鮑生
叔牙 鮑氏有三

唐氏有二堯之後為唐周以封晉此晉之唐也伊祁姓
變父之後封于唐為楚所并此楚之唐也姬姓堯
之後分為六唐氏杜氏范氏劉氏韋氏祁氏唐晉
昌陶唐氏之後封唐侯以國為氏又望出太原杜
甫敬寄族弟唐十八使君詩與君陶唐後盛族多其
人

費

江夏

商辛臣費仲夏禹之後

廉

河東

角音

顓頊曾孫大廉之後以字為氏河東

郡縣多蘆村

薛河東徵音黃帝二十五子一為任姓裔孫奚仲居
薛至仲虺為湯左相代為侯伯歷三代凡六十四葉
周末為楚所滅公子登仕楚懷王賜沛邑為大夫遂
以國為氏薛氏出自任姓黃帝孫顓頊少子陽封
于任十二世孫奚仲為夏車正禹封為薛侯其地魯
國薛縣是也奚仲遷於邳十二世孫仲虺復居薛為
湯左相臣扈祖已皆其胄裔也祖已七世孫成徙國

於摯更號摯國至武王克商後封為薛侯歷三代凡
六十四世至愍侯洪為楚所滅洪十三世孫愿為淮
陽太守因徙居焉愿十世孫寃州別駕蘭為曹操所
殺子永從蜀先主入蜀為蜀郡太守永生齊巴蜀二
郡太守蜀亡率戶五千降魏為光祿大夫徙河東汾
陰世號蜀薛二子懿始懿襲鄆陵侯三子恢雕興恢
號北祖雕號南祖興號西祖 南祖薛氏 西祖興
三子紇清濤濤與北祖南祖分統部衆號三薛都統

濤四世孫洪祚洪隆瑚昂積善號五房亦為瀕上五
門薛氏大房 衆議以薛氏河東茂族魏高祖曰薛
氏蜀也豈可入郡姓直閣薛宗起執戟在殿下出次
對曰臣之先人漢末仕蜀二世歸河東今六世相襲
非蜀人也陛下黃帝之裔不賞受封北土耶今不預
郡姓何以生為乃碎戟於地高祖徐曰然則朕甲卿
乙乎仍曰卿非宗起乃起宗也 河南官氏志叱干
氏改為薛 劉禹錫薛謩神道碑自奚仲為夏車服

大夫距今數千年乘軒服冕爲奕冠世言氏族者署
爲關內甲姓天意若曰始有功於車錫爾子孫世世
有之 薛瑄汾陰阡表河津古河東地我先世自得
姓以來卽居之鮮有徙寓四方者故族屬蕃大不下
數百人家沒而葬於汾陰之南坡封樹累累焉 薛
氏血脉譜文王曹夫人姜氏見赤龍交而孕十二月
生子手把薛字因氏爲薛

畢

河南

望出太原畢公高之後以國爲氏

郝太原徵音 郝氏出自郝省氏太昊之佐也商帝乙
之世裔孫期封於太原之郝鄉因以為氏裔孫晏秦
上卿晏孫瑗太原守生夔漢匈奴中郎將裔孫晉末
因官徙潤州丹陽又徙安陸

鄔太原晉大夫鄔臧之後食邑于鄔

于氏出自姬姓周武王第二子邶叔子孫以國為氏復
去邑為于氏其後自東海郟縣隨拓跋鄰徙代改為
萬紐于氏後魏孝文時復為于氏 路史赤于之後

有于氏邗氏孟氏萬紐于氏 于氏自采碑至勁累
世貴盛一皇后四贈公三領軍二尚書令三開國公
周于文公謹子孫繁衍皆至顯達當時莫比謹即
勁從曾孫也

傳清河殷相傳說築於傅巖因以為氏 傅氏出自姬
姓黃帝裔孫大由封于傅邑商時虞虢之界有傅氏
居於巖旁號為傅巖盤庚得說於此命以為相裔孫
漢義陽侯介子始居北地

元河南北魏孝文帝改拓跋氏為元氏又望出太原

黃帝生昌意昌意少子惇居北十一世為鮮卑君長

魏書自孝文帝以前宗族皆書元氏

卜西河羽音周禮卜人氏以官為氏

平汝南韓哀侯少子姑食采平邑因氏焉

和汝南義和掌天地之官和仲和叔因以為氏

姚吳興舜生于姚墟謂之姚虞後因氏胡公滿之孫亦

為姚氏舜姓姚其後為媯又為陳為田為穰為威

為法為王為哀為轅為儲為占為息為陸為司馬為
胡母為顓孫子獻子鞅子芒子尚子禽子輿子寤子
沮子夏子宋第二第五第八 姚義從學河東受王
佐之道

汪平陽商音 汪芒氏之後

初太原徵音 帝堯伊初之後與祈通 初氏有三晉
獻公孫英食采於初遂以為氏又隰叔之後又黃帝
後

毛西河羽音 周文王第九子封毛稱毛伯以國爲氏

禹隴西夏禹之後

狄氏出自姬姓周成王母弟孝伯封於狄城因以爲氏

孔子弟子狄黑裔孫漢博士三世居天水後秦樂平

侯伯支裔孫恭居太原生湛東魏帳內正都督臨邑

子孫孝緒唐尚書左丞臨穎男生知遜越州刺史生

仁傑 路史狄子寒侯皆武穆也後各爲氏 謝邁

撫州狄守祠堂記公江陵人唐宰相梁公之苗裔以

儒術吏事顯公能世其家者也

伏太原商音 伏羲風姓之後子孫氏焉與任宿須句

顓臾同祖 風后解人

宋氏出自子姓殷王帝乙長子啓周武王封之於宋三
十六世至君偃為楚所滅子孫以國為氏楚有上將
軍義義生昌漢中尉始居西河介休十二世孫晃晃
三子恭畿洽徙廣平利人 魏書宋隱字處默西河
介休人祖爽晉昌黎太守後為慕容廆長史祖活中

書監父恭尚書徐州刺史慕容儁徙鄴恭始家於廣平

紀平陽徵音炎帝之後封於紀以國為氏

祝太原商音周武王封黃帝之後於祝因氏又祝史之後以官為氏

董隴西角音黃帝之後似姓國有颺叔安裔子董父好龍龍多歸之曰豢龍氏舜賜姓董因氏董氏有二董父之後以字為氏董氏出自姬姓董父商孫

辛有辛有子孫分適晉有董狐裔孫翳封翟王都高
奴遂居隴西漢江都相仲舒少子之孫自廣州徙隴
西裔孫徙河東

梁安定秦仲有功封其少子康於夏陽是為梁伯後為
秦所滅子孫以國為氏唐上柱國梁思墓誌秦仲
伐西戎有功周平王東遷封少子康於夏陽梁山因
而命氏

杜

京兆

初姓帝堯劉累之後在周為唐杜氏成王滅唐

遷封杜伯為宣王所滅杜洩奔魯因氏焉 師古曰
唐杜二國名也殷末豕韋徙國於唐周成王滅唐遷
之於杜為杜伯杜伯之子隰叔奔晉士會即隰叔之
裔孫也唐太原晉陽縣也杜京兆杜縣也

阮陳留殷有阮國在汾渭之間子孫以國為氏

席安定 晉大夫籍談之後伯鷹司晉典籍因氏裔孫環

避項羽名改為席 路史陽奕司籍或以籍席出於

荀

賈武威唐叔虞少子公明康王封于賈為賈伯河東臨汾有賈鄉即其地也為晉所滅以國為氏 通志康王以虞之幼子公明為賈伯曲沃滅之有賈氏右行氏賈孫氏 晉公族狐偃之子射姑為晉太師食邑于賈字季他亦號賈季

路氏有四一潞子爵晉滅之以國為氏

童雁門宮音 顓頊生老童以王父字為氏

郭太原商音 郭氏出自姬姓周武王封文王弟虢叔

於西虢封虢仲於東虢西虢地在虞鄭之間平王東遷奪虢叔之地與鄭武公楚莊王起陸渾之師伐周責王滅虢于是平王求虢叔裔孫序封於陽曲虢曰郭公虢謂之郭聲之轉也因以為氏後漢末大司農郭全代居陽曲孫鎮謁者僕射昌平侯裔孫徙潁川後魏祠部尚書介休宋弁自許膏腴孝文帝以郭祚晉魏名門從容謂弁曰卿固當推郭祚之門魏孝文帝幸長安行經渭橋過郭淮廟問黃門侍郎郭

祚曰是卿祖宗所承耶祚曰是臣七世祖帝曰先賢
後哲頓在一門因敕以太牢祭淮廟令祚自撰祭文
華陰郭氏亦出自太原漢有郭亭亭曾孫光祿大
夫廣智玄孫馮翊太守孟儒子孫自太原徙馮翊

昌樂郭氏亦出自太原後漢郭泰字林宗世居介休
裔孫居魏州昌樂 五代唐郭崇韜為樞密使用事
自宰相豆盧革等附之以其姓郭因問崇韜曰汾陽
王本太原人徙華陰公世家雁門豈其宗派耶崇韜

曰因遭亂亡失譜牒嘗聞先人言上距汾陽四世耳
革曰然則固從祖也

鍾氏出自子姓與宗氏皆晉伯宗之後也伯宗子州犁
仕楚食采于鍾離因以為姓楚漢時鍾離昧二子長
曰發居九江仍故姓次曰接居潁川長社為鍾氏

高氏出自姜姓後漢高洪渤海太守因居渤海修縣裔
孫泰北燕吏部尚書中書令曾孫樹生歡乃北齊神
武也高士廉遷尚書右僕射三世此官世榮其貴

夏會稽

夏氏有二其一夏后之後以國為氏其一陳靈

公子子夏之後左氏傳所謂少西氏也歸有光夏

氏世譜夏今陝州夏縣禹所都因以為有天下之號
者也

田雁門徵音

舜後陳厲公子完字敬仲仕齊號田氏

敬仲仕齊初有采地因號田氏又云陳田聲相近

也後徙陽陵又徙北平晉公族有田氏

樊上黨商音

文王後虞仲支孫為周卿士食采于樊

因氏又望出南陽

胡安定周武王元女配胡公滿封于陳為周陶正以謚

為姓

霍太原羽音周文王第六子霍叔之後以國為氏又

望出河東褚少孫三代系論古諸侯以國為姓霍

者國名也武王封弟叔處於霍晉獻公滅霍公後世

為庶民往來居平陽國語先且居蒲城伯後受霍

為霍伯何世守霍文敏公韜行實得姓自周封霍

叔家太原其後世自太原徙南雄又自南雄徙南海
虞陳留舜有天下號曰虞子商均為虞賓因為虞氏又
武王弟叔虞之後以字為氏虞氏有二姚姓之虞
舜後也姬姓之虞仲雍之後也

萬扶風商音畢萬之後一云芮伯萬之後以字為氏
又望出河南萬氏有三

咎太原徵音

房清河堯子丹朱封房邑侯以邑為氏房氏出祁姓

舜封堯子丹朱於房朱生陵以國為氏陵四十七世
孫漢常山太守雅徙清河繹幕

裴本仇氏避難改焉

求氏同

解平陽商音唐叔虞子良食采于解以邑為氏

宗氏出自子姓宋襄公母弟敖仕晉孫伯宗為三卿所
殺子州犁奔楚食采於鍾離州犁少子連家於南陽
以王父字為氏世居河東宗京兆望一出河東周
大夫伯宗之後以官為氏

包上黨羽音 楚大夫申包胥之後以字為氏又望出

丹陽

龔武陵 晉大夫龔堅之後

嵇譙國 夏少康封子季杼于會稽遂為會稽氏漢初徙

譙稽氏改為嵇氏

裴河東 商音 裴氏出自風姓顓頊裔孫大業生女華

女華生大費大費生皐陶皐陶生伯益賜姓嬴氏生

大廉大廉十一世孫蜚廉蜚廉六世孫非子周孝王

使養馬沂渭之間以馬蕃息封之於秦為附庸使續
嬴氏號曰秦嬴非子之支孫封豳鄉因以為氏今聞
喜豳城是也六世孫陵當周僖王之時封為解邑君
乃去邑從衣為裴裴衣長貌裴氏有三伯益之後
封裴鄉以鄉為氏又晉平公封顓帝孫於裴中號裴
君子孫以為氏裴王二族盛於魏晉之世時人以
為八裴方八王徽比王祥楷比王衍康比王綏綽比
王澄瓚比王敦遐比王導顧比王戎邈比王元裴

氏居燕者號東眷居涼者號西眷居河東者號中眷
西眷裴出自茂長子徽魏冀州刺史蘭陵武公以
其子孫多仕西涼故號西眷四子黎康楷綽黎二子
粹芑粹子詵詵詵避地涼州及苻堅克河西復還解
縣洗馬裴出自粹子暄暄生懂自河西歸桑梓居
解縣洗馬川號洗馬裴南來吳裴出自黎第二子
芑芑孫嗣嗣子扈度江居襄陽扈孫叔業齊南兗州
刺史初歸北號南來吳裴事後魏豫州刺史蘭陵忠

武公 中眷裴氏出自嗣中子天明晉太尉宋公版
詔議叅軍并州別駕號中眷 東眷裴出自茂第三
子輯輯孫武晉大將軍元菟太守永嘉末避地平州
裴氏定著五房唐宰相十七人

荀氏有二本侯國也又荀林父以邑為氏 荀 河内文
王第十七子郇侯改邑為氏

羊 河上羊舌氏之後肸叔向鮒叔魚春秋時始單姓羊
甄 中山舜陶甄河濱因氏

芮平原周司徒芮伯萬之後

諸河東羽音陳敬仲裔齊儲子之後後漢河東儲

大伯光武初為諫議大夫

酈與丙同望出魯國晉大夫食米于酈因氏焉

井扶風虞大夫井伯姜子牙之後以字為氏

段氏干木之子隱如入關去干氏改為段氏

巫平陽商音以技為氏

焦中山周武王封神農之後於焦因氏焉

弓太原羽音 魯大夫叔弓之後以王父字為氏

侯上谷晉侯緡之後適他國以侯為氏 侯氏有二其

一夏后氏之後封於侯子孫因以為氏

伊陳留古有伊初氏其後以伊為氏

宮太原羽音 虞大夫宮之奇之後又望出河東

仇平陽宮音 宋仇牧之後

欒西河徵音 唐叔虞之後晉靖侯孫賓食采欒邑因

氏焉欒氏有二一欒賓之後姬姓也以邑為氏

祖范陽殷祖甲祖乙支庶因氏祖乙祖辛祖丁祖庚
之子孫皆稱祖氏

武太原羽音出自姬姓周平王少子生而有文在手
曰武遂以為氏漢有武臣為趙王梁鄒孝侯臣十四
世孫陔晉左僕射薛定侯陔五世孫平北將軍五兵
尚書晉陽公洽別封大陵縣賜田五十頃因居之

李嶠攀龍臺碑元和姓纂胥曰有文在手柳芳姓
系錄論於謚則文武成宣氏洽生祭酒神龜神龜

生本州大中正司徒越王長史襲壽陽公克己克己
生北齊鎮遠將軍襲壽陽公居常居常生後周永昌
王諮議參軍儉儉生隋東都丞華華生士彥 權德
輿武就神道碑周室之興本於忠厚趙王之裔厥有
勛賢元魏有五兵尚書雁門朔方雲中馬邑四郡太
守洽啟封晉陽田祿益大 李翱武儒衡墓誌銘武
宗出自周聖發之苗厥孫聘魯乃列春秋秦漢之交
曰臣王趙實大其家亭侯以紹厥支十七晉陽乃封

子孫因家以及於唐

劉氏出自祁姓帝堯陶唐氏子孫生子有文在手曰劉
因以為名 高祖頌漢帝本系出自唐帝降及於周
在秦作劉涉魏而東遂為豐公 劉彭城陶唐氏之
後受封於劉裔孫劉累又劉康公乃周定王母弟也
劉氏有五堯之後有劉累為劉氏成王封王季之
子於劉邑亦為劉氏 唐末五代亂衣冠舊族多離
去鄉里或爵命中絕而世系無所攷惟劉氏自溫叟

十二代祖北齊中書侍郎環雋以下仕者相繼而世牒具存焉 環雋乃左賢王去卑裔孫庫仁之後

景晉陽角音 芊姓楚公族之後漢初徙豪傑於關中

今陝西多此姓 唐宰相元載本景氏

龍武陵舜臣董父好龍曰擾龍氏以王父字為氏 龍氏有二舜臣龍為納言以名為氏又董父已姓以能畜龍故賜氏為豢龍氏子孫以為氏

幸雁門 宮音

郛

京兆

周文王第十一子封于郛子孫以為氏左傳

焚我箕郛

黎

京兆

黎侯殷周時國子孫以為氏又風俗通云九黎

之後今嶺南多此姓

薄

雁門

宮音

白氏出自姬姓虞公族井伯奚媵伯姬於秦受邑於百里因號百里奚奚生視字孟明古人皆先字後名故稱為孟明視孟明視二子一曰西乞術二曰白乙丙

其後以為氏裔孫武安君起賜死杜郵始皇思其功
封其子仲於太原故子孫世為太原人 白居易故
鞏縣令白府君行狀始皇思武安之功封其子仲於
太原子孫因家焉故今為太原人自武安以下凡二
十七代至府君高祖諱建北齊五兵尚書

蒲河東角音 蒲洪先代家居池上生蒲長三丈因以
為氏至洪改姓苻

鄂武昌 晉鄂侯之後子孫以國為氏 鄂氏有二

籍

廣平

出於伯氏司晉之典籍以官為氏 籍卽籍字

卓

西河徵音

蘭

中山

晉韓厥支孫仕趙食采於蘭以邑為氏 李東

陽順天府尹蘭琦墓誌蘭出晉韓厥支孫以邑為氏

今世頗希見居濟南德平者為鉅族

屠 蒯晉膳宰也屠氏職以割牲為事

池

西河徵音

以居為姓

喬氏出自姬姓本橋氏漢太尉玄六世孫勤居同州勤

孫達後周文帝命橋氏去木義取高遠也世居太原

陰氏有三夷吾六代孫為陰大夫以邑為氏

鬱太原宮音與蔚姓通

胥瑯琊胥氏有二晉大夫胥臣之後以字為氏

能音耐商音熊摯之後避難改為能氏

倉倉頡之後

莘天水夏后啓支子封莘因氏焉

党馮翊與黨姓通晉大夫黨氏之後

原氏周文王第十六子原伯之後 路史胥臣為原大
夫次卿也故先穀曰原穀繼于焮 武王姓姬其後
為原為霍為狐為聃為郤為士為晉為韓為欒為郤
為溫為祁為苟為中行為智為輔為續為羊舌為叔
向為畢為郇為馮為魏為虞為虢為梁 沁水原城
崞縣原平驛

宰

西河徵音

周大夫宰孔之後以官為氏

郤

濟陰晉大夫郤生豹豹生芮芮生缺

通西河商音 巴大夫食采通州因氏焉

冀渤海晉大夫卻芮食采于冀其後以為氏

尚 望出上黨周太師尚父之後

農雁門宮音 風俗通神農之後

溫平原唐叔虞之後晉公族受封河南之溫因以命氏

又卻至食采于溫號溫 溫氏有二唐叔虞之後封

溫以封為氏又溫恩氏改溫氏 漢溫疥封枸侯孫

何始居太原祁縣何十四世孫晉江州刺史始安忠

武公溫嶠從子楷隨桓謐奔於後魏 溫大雅與弟
彥博大有皆知名薛道衡見之歎曰三人者皆卿相
材也高祖兵興引為大將軍府記室參軍主文檄帝
受禪黃門侍郎對管華近帝謂曰我起晉陽為卿一
門 溫造天子愛其才問造家世及年對曰臣五世
祖大雅外五世祖李勣臣犬馬之齒三十有二帝竒
之 溫庭筠述懷詩采地荒遺野爰田失故都注予
先祖國朝公相晉陽佐命食采於并汾也

柴平陽商音姜姓齊文公子高之後後有柴高子孫

以為氏楊億柴成務墓誌銘其先平陽人漢棘蒲
之後也世亂流寓不常厥居公之遠祖占籍河朔積
德有後宗派盛焉五代祖賡因官曹南遂家於濟陰
郡

閭太原宮音唐叔虞之後晉成公子懿食采於閭邑
晉滅子孫散處河洛裔孫昌晉時奔於代王猗盧遂
居馬邑孫滿後魏諸曹大夫自馬邑又徙河南孫善

龍驤將軍雲中鎮將軍因居雲州盛樂 獨孤及右
金吾衛將軍閻用之墓誌遠祖曰文周昭王瑕之後
也生而手有文曰閻康王竒之命封閻城文四十五代
孫滿仕後魏

連上黨徵音齊大夫連稱之後

茹魏世宗時吳人茹皓官達自云本出雁門雁門人
諂附者乃因薦皓於司徒請為肆州大中正詔特依
許

魚

雁門

羽音

宋司馬子魚之後以王父字為氏

易

太原

徵音

齊大夫易牙之後即雍巫也今江東多

此姓

戈

蒲州有戈氏出河東

居

雁門

宮音

晉大夫先且居之後以王父字為氏

衡

雁門

伊尹為湯阿衡子孫以衡為氏

步

平陽

羽音

晉大夫步揚之後食采于步因氏焉

三國志步騭其後也

路史步居溫則為步溫

耿高陽望一出河東殷時侯國尚書祖乙圮于耿晉大夫趙夙滅之因氏焉耿清惠九疇刑部尚書文恪裕太子太保吏部尚書

滿山陽望出河東陳胡公滿之後

弘太原角音風俗通衛大夫弘演之後

匡太原角音須句之後為魯匡邑宰因氏

文雁門商音文王支孫以謚為氏又有本姓敬避諱去苟為文介休文潞公之先乃敬氏也

歐平陽商音

沃太原羽音 子姓殷王沃丁之後今吳興有此姓

越太原羽音 夏少康之後姒姓越王勾踐裔孫無疆

為楚所滅子孫以國為氏河南官氏志越疆氏改為

越氏焉

師太原徵音 周師尹之後

聶河東徵音 衛大夫食采于聶因氏焉 魏馬邑張

遼本聶壹之後以避怨變姓

辛隴西姒姓之後夏后氏封支子于莘後去草為氏

辛出自姒氏夏后啓封支子于莘莘辛聲相近遂為
辛氏周太史辛甲為文王臣封於長子秦有將軍辛
騰家於中山苦陘曾孫蒲漢初以豪傑徙隴西狄道
簡范陽晉續簡伯之後

饒平陽羽音

曾魯國夏少康子成烈封為鄆太子巫去邑為曾

關氏有二風俗通云關令尹喜之後又云夏大夫關龍

逢之後 蜀前將軍漢壽亭侯生侍中興其後世居
信都裔孫播相唐德宗

蒯襄陽晉大夫蒯得之後

相西河商音 武洛山出四姓其一曰相平氏

續雁門羽音 晉大夫狐鞠居食采于續故謂之續姓

苑舜七友續牙之後 路史繇祁易續則為續祁

士河南士氏有二隰叔為晉士師以官為氏又士季氏
之後以字為氏

州 晉有州綽州賓其先食采于州因以為氏 州氏

有二

鹿徵音 趙大夫食采五鹿因氏焉

姒氏有二伯鯨之姓 如伯鯨之姓為堯崇伯賜姓姒
氏其後杞為姒姓之後又云禹母吞薏而生因姓姒
氏 禹姓姒其後為夏為啓又為杞為稽為夏侯于
越

狐氏有二唐叔之後世為晉卿 狐姬姓周平王子狐

之後貴族之女故無氏言之 世本有大狐氏小狐氏
溱為大狐氏射姑為小狐氏 路史狐本重耳外
祖狐突郤陽狐皆采溫故後以狐為溫出蓋晉後以
封狐爾

狼氏有二晉大夫狼曠之後

顛氏有二晉大夫顛頡之後 顛徵音 周臣太顛之
後

苟 河內望一出西河 敬姓避名晉諱去文姓苟與去

苟姓文者同 苟氏之族見於後世者有田氏程氏
輔氏智氏

敬平陽

商音

出自媯姓陳厲公子完適齊謚曰敬仲

子孫以謚為氏敬仲之後至秦有敬丕丕生敬為河
東太守子孫因官家焉裔孫昌漢封猗氏 敬氏至
宋以諱改為文今潞公家是其氏也亦為恭氏

遲太原徵音

騏河東周之時有騏期

耆堯姓伊耆之後

衰趙衰之後

恭晉太子申生諡恭君其後以為氏

隨河內晉大夫隨武子之後與隋姓同隋文帝去走為

隋

羲堯掌天地之官子孫氏焉

丕晉大夫丕鄭之後

卑望出雁門卑耳國之後

媯 舜居媯汭其後因以為氏

箕 晉大夫箕鄭之後

歸 京兆 春秋晉有歸生婦人子孫因之以為氏

閭 頓丘 唐叔之後

新 晉大夫新穆稚子之後

壺 晉大夫邑也子孫以國為氏

鞮 東鞮後風俗通晉銅鞮伯華之後 路史陔蹄

鞮 鮐出於銅鞮

斤望出代郡

臺臺駘之後

繁望出上黨商人七族有繁氏

軍冠軍侯之後因以為氏見姓苑

吞晉陽

來平陽商之支孫食采于邾避難去邑因以為氏

爰濮陽卽袁氏陳胡公九代孫爰伯諸之後

丹堯子丹朱之後

觀如姓夏有觀扈皆同姓之國子孫以國為氏

先絳郡商音 晉大夫先軫先蔑之後 路史先軫封

原且居徙霍有霍伯有先氏左行氏

綿梓潼

晉大夫食采綿上因氏焉

招南海 晉步招之後以名為氏

臯廣陵 臯陶氏之後

蛾姓苑 晉大夫蛾析之後

嘉 晉大夫嘉父之後

杞 本巴氏東樓公之後後漢杞康避董卓改為杞氏
媯 女媯氏之後

堯 上黨 角音 帝堯之後支孫以為氏
褒 姒姓禹之後也

鄆 太原 趙大夫食采深澤鄆邑因氏焉

英 晉陵 皐陶之後以國為氏

乘 平陽 楚大夫子乘之後以王父字為氏

徵 理徵之後

牟平陽宮音 祝融之後為牟國子孫以國為氏

投郇伯周畿內侯桓王代鄭投先驅以策其後氏焉
舟晉大夫舟之僑之後

莒嬴姓伯益之後封于莒其後以國為氏

娥姓苑堯妻舜以娥皇後有此姓

盈晉欒盈之後

囊平陽楚莊王子囊之後以字為氏

嬴太原秦姓伯益之後望出太原河東

生姓苑 陰飴生之後以名為氏

嬰 晉大夫趙嬰齊之後

韶 州名見林寶姓苑 望出太原今開封有此姓

并 州名見姓苑

甥 亦作生 晉呂甥之後

繒 姓苑 夏后有繒氏

鄆 姒姓 夏少康封少子曲烈于鄆 其後為氏

陘 晉大夫以邑為氏

仍姓苑 有仍氏生少康以國為氏

樓杞國夏少康之佐周封杞東樓公支孫以樓為氏今

東陽多此姓

犇晉大夫卻犇之後

臨西河八凱大臨之後

暉狼暉之後

男夏后有男氏

杞如姓夏后之後封于杞以國為氏

理西河咎繇為堯理官子孫遂為理氏

侶官氏志如亦改為侶

為音委出自劉累之後杜伯子為晉司空後以為氏

紙後魏書禹後渴侯氏改為紙氏

堵河東羽音

締路史隼分於郤郤出於締晉國以采氏者締郤

步涉畜偁郤白若冀解張楊陽端續溫祁鄔羊介翼

孟駒州樂原霍及揚干銅鞮羊舌析夜長魚五鹿東

關邾州

啓夏后啓之後

輔扶風晉之公族智氏亡其宗別焉

苦卻犇號苦成子苦為別封之邑以邑為氏

主嬴姓即主父氏今同州有此姓

苑望出馬邑殷武丁子文封苑其後為氏

展河東魯孝公子展之後無駭卒公命以字為展氏

矯風俗通晉大夫矯父之後後漢有扶風矯慎

丙平陽商音 齊大夫丙敬之後

咎 卽舅氏舅犯左傳亦作咎犯

減汝南 巫咸氏之後

酉 出太原黃帝十四子之一姓也

啖 望出河東亦作噉 唐啖助精春秋學

舅 晉大夫舅犯之後姬姓孤氏晉惠公文公皆孤氏

甥 故以犯為舅因以為氏

絳 晉穆侯遷都於絳後以為氏

智天水望一出河東姬姓卽荀氏別食智邑又為智氏

義河東漢秦州義道人年一百五十歲

餽晉中行穆伯攻鼓餽閒倫欲其嗇夫而下之不從

樹河南後魏書樹洛干氏後改姓樹姓苑云河東人

具魏郡風俗通晉大夫具丙之後

麗晉匠麗之後

壹河東本姓樹改作壹

𩺰士會支子鮐別食采𩺰邑

鑄 風俗通左傳宣叔娶於鑄氏

介 姓苑 望出太原

祭 太原 徵音 周公第五子封祭稱祭伯後因氏

代 古代君為趙襄子所滅以代為氏

舜 河東 角音 見姓苑

亢 去聲 見姓苑

晉 號郡 望出平陽三家滅晉靜公遷為家人子孫因以

為氏 晉公族有晉進戊恭整舅咎羊田獻射席籍

及士貞樓季大戊叔魚叔向叔夙季嬰揚食食我凡
閻伯宗伯州公仇公師弗忌白季子羽之氏

員

平涼

本姓劉氏以忠諫比伍員改姓員氏賜名懷遠

唐員半千臨汾人

員音運

獻晉獻公之後

貫望出西河

射晉大夫虢射之後

曠師曠之後

頡倉頡之後

勃

頓丘

晉有寺人勃鞞梁武帝改豫章王為勃氏

實實沈之後以名為氏

六偃姓皐陶之後以國為氏

曲望出雁門晉穆侯封少子于曲沃因氏焉

凍

音七水名見姓苑

蓼皐陶之後封于蓼以國為氏

郤山陽晉大夫郤元子食邑于郤因以為氏

洪武正韻作隙

幕 舜祖幕之後

悅

昌黎亦作說

傳說之後以說為氏

鐸 望出絳州今絳州有此姓

百 秦大夫百里奚之後

落 風俗通皋落氏狄國也亦狄別種

拓 拓跋氏改為拓又元姓

英 風俗通英成僖子晉大夫也王僧孺百家志荀永
之娶平陽英氏

伯晉大夫荀林父之後父為中行伯其後以王父字為氏

格

陳留

允格之後見姓苑

號

弘農

王季之子號仲國為晉所滅子孫以國為氏

析望出西河

風俗通衛公族大夫析米鉏之後以

王父字為氏

翼

東海

姬姓晉翼侯居翼城因氏焉

稷后稷之子子孫氏焉

源 後魏聖武帝詰汾長子七世孫禿髮檀據南涼
子賀降後魏太武見之曰與卿同源可改為源氏
婁 出自姒姓夏少康裔孫東樓公封于杞為楚所滅
子孫食邑於婁因以為氏城陽諸縣有婁鄉是也
尉 元魏八姓也秦漢置尉堠官其先有居此職者因
以氏焉

隗 畢振姬曰黃帝封神農參盧於潞商周別為赤白
之狄狄歷唐咎皐落九州之戎有隗氏皐落氏戎氏

春秋晉人滅潞以潞子嬰兒歸留吁鐸辰甲氏沙子
鼓子奄為晉有有潞氏路氏露氏榆氏中路氏失地
也

二字姓

侯岡 地記倉頡姓侯岡氏

伊祈堯姓

子州 莊子堯以天下與子州支父

栢成 風俗通栢成子高堯時諸侯也

阪上 上黨屯留人其先居阪上因氏

陶丘 帝堯子丹朱居陶丘因氏

癸比 癸比女為舜妃

西王 新序子夏曰禹學於西王國

中英 虞舜有五英樂掌中央者因以為氏

恭龍 古颺叔安裔子曰董父好龍龍多歸之帝舜嘉之賜氏曰恭龍氏

司徒 舜為堯司徒支孫氏焉

司空

頓丘

禹為堯司空支孫氏焉

成功禹治水成功而少子遂以為氏

有男如姓史記禹後有有男氏

舒蓼世本舒蓼姓皐陶之後

關龍夏忠臣關龍逢之後

擾龍劉累之後

鍾古風俗通鍾古夏內史也因氏焉

御龍風俗通陶唐氏之後有劉累學擾龍事夏九甲

賜氏曰御龍氏 九甲卽孔甲也

葛伯 嬴姓夏時諸侯為商所滅子孫因以為氏

傅餘 英賢傳傳說為相子孫留傳巖者號傅餘氏

巫咸 商卿士其後氏焉

司馬 河內 程伯休父為周司馬錫以官族因氏

歐陽 渤海 越王勾踐之後支孫封烏程亭侯因氏焉

歐陽修 石本歐陽氏譜圖序歐陽氏之先本出於夏

禹之苗裔自帝少康封其庶子於會稽使守禹祀歷

夏商周以世相傳至於允常子曰勾踐是為越王越王勾踐傳五世至王無疆為楚威王所滅其諸族子分散爭立皆受封於楚而無疆之子蹄封於烏程歐餘山之陽為歐陽亭侯其後子孫遂以為氏

夏侯譙國夏禹之後封杞楚滅簡公弟他奔魯封夏陽

侯因氏焉

令狐氏出自姬姓周文王子畢公高裔孫畢萬為晉大夫生芒季芒季生武子魏犇犇生穎以獲秦將杜回

功別封令狐生文子頡因以為氏世居太原秦有太原守五馬亭侯範十四世孫漢建威將軍邁與翟義起兵討王莽兵敗死之三子伯友文公稱皆奔燉煌友入龜茲文公入疏勒稱為故吏所匿遂居效穀鍾離姬姓卽鍾氏以伯州犂居鍾離故曰鍾離東樓如氏少康之後支孫封為東樓公因為東樓冬日趙衰之於人如冬日可愛故因氏焉

中行晉公族隰叔之後荀林父將中行故曰中行氏

公族 風俗通晉成公立嫡子為公族大夫韓無忌號
公族穆子後漢有勃海公族進階

吾丘

初夜 英賢傳初大夫之後

蒲成 晉大夫有蒲成南

郟州 世本晉郟豹孫步陽生郟州因氏焉

夷吾 姬姓晉惠公名夷吾其後支庶以名為氏

司功 晉大夫司空景子因官為氏

屠岸 晉大夫有屠岸賈

狐丘 晉大夫狐丘林之後英賢傳士目狐丘封人之

裔

西門 晉陽徵音 晉大夫居西門因氏焉

安是 英賢傳晉大夫安是叔施

新垣 風俗通魏將新垣衍畢公高之後

韓褐 姬姓晉韓厥之後

原伯 原伯紱之後因氏焉

周蓋英賢傳晉孝公時

邯鄲嬴姓趙穿食邑邯鄲因以為氏

韓餘世本韓宣子之後因氏焉

韓嬰姬姓纂晉韓宣子孫為韓嬰氏

韓言姬姓韓厥生無忌無忌生襄襄生子魚為韓言

氏

韓厥姬姓韓獻子厥支孫氏焉

韓籍姬姓晉韓延之子籍字叔禽為韓籍氏

韓侯 周宣王時韓侯支孫氏焉

瑕呂 晉有瑕呂飴甥

顓孫 嬀姓陳公子顓孫仕晉子孫氏焉

胡非 嬀姓陳胡公後有公子非其後子孫為胡非氏

胡母 風俗通胡母姓本陳胡公之後也公子完奔齊

遂有齊國齊宣王母弟別封母鄉遠本胡公近取母

邑故曰胡母氏

先穀 晉國士氏之別族也隰叔初封於先故以為氏

臯落 姬姓東山臯落氏赤狄別種

王官 晉大夫有王官無地

羊舌 姬姓晉公族靖侯之後食采於此故為羊舌大夫

相里 咎繇之後為理氏晉大夫里克被戮少子季連
逃居相城因為相里氏

梁由 晉大夫有梁由靡

楊孫 楊晉邑也其先有食采於楊者

長魚 晉有長魚矯

梁其 姬姓大夫梁其蹯之後

梁餘 晉下車御梁餘子養之後

姑布 晉大夫有姑布子卿

唐孫 初姓堯之裔唐侯子孫仕晉號唐孫氏

青史 陸璟獻英賢傳晉太史董狐之子受封青史之

田因氏焉

侯史 風俗通董狐為晉侯史官因氏焉

仇吾韓子云仇吾國為智伯所滅因氏焉

樓季姬姓晉穆侯庶子樓季之後

投壺中行穆子相晉侯投壺而生子因以為姓

南鄉晉高士居隱南鄉因氏焉

三鳥風俗通凡氏干職三鳥五鹿有三鳥大夫因氏
焉

函與晉大夫范臯夷食采函與因氏焉

子獻媯姓陳桓公孫子獻之後

子羽 姬姓姓纂云晉公族子羽之後為楚隋邑大夫
路史韓起庶子亦曰子羽

子尚 媯姓陳僖公生廩丘子尚裔因氏焉

五鹿 姬姓風俗通衛邑也晉公子重耳封舅犯於五
鹿支孫氏焉代郡成陽縣有五鹿氏 柳芳姓系錄
論於志則三烏五鹿氏

主父 嬴姓趙武靈王號主父支孫因以為氏
子鞅 媯姓陳僖公生簡子齒為子鞅氏

子芒 嬀姓陳僖公生盈字子芒之後

子輿 嬀姓陳桓公生子石難為子輿氏

子禽 嬀姓陳僖公生惠字子得為子禽氏

苦成 姬姓郤隼別封於苦為苦成子 庫成風俗通
本苦成方言變為庫成 路史苦成庫成古成車成

出於苦

子寤 嬀姓陳僖公生宣子其後為子寤氏

子沮 嬀姓陳桓公生子輿為子沮氏

子夏 嬀姓陳公子少西字子夏因氏

子宋 嬀姓陳宣公生子楚其後為子宋氏

武成 嬴姓風俗通趙平原君勝封武成君因氏焉

偃師 嬀姓陳太子偃師之後

梗陽 晉有梗陽巫皋

右行 晉屠擊將右行因氏焉

戲陽 晉邑子孫以邑為氏

步陽 晉大夫步陽御戎 一作步揚

利孫 晉大夫公子利孫其後氏焉

季嬰 世本晉季嬰之後

季夙 世本晉靖侯孫季夙之後

魏疆 姬姓魏武子支孫莊子快為魏疆氏

大戊 姬姓晉公子大戊之後

大狐 姬姓世本晉大夫大狐伯生突突生饒號為大

狐氏

褐餘 潛夫論曲沃桓叔之後

段干 姓苑段干木之後西河人

少室 國語少室周為趙簡子戎右

匠麗 晉有匠麗氏

伯州 晉有伯州犁

下軍 晉欒黶為下軍大夫支孫氏焉 路史欒書下

軍及嘉若欒出於欒

屋廬 周屋廬子著書言彭聃之法晉賢人

鬬耆 芊姓英賢傳鬬伯比之後孫鬬耆仕晉因氏焉

北唐英賢傳晉有高人越者隱伏於北唐因氏焉
叔帶 嬴姓趙夙字叔帶以字為氏

叔向 晉羊舌大夫之後羊舌肸字叔向以字為氏

叔魚 羊舌鮒字叔魚以字為氏

弗忌 姬姓晉大夫欒弗忌之後

樂王 晉大夫樂王鮒之後

續祁 姬姓晉隰叔之後與士氏同族祁奚舉子午自
代父子相續為政因氏

伯宗 世本晉孫伯起生伯宗因氏焉

百里秦國風俗通秦相百里奚之後其先虞人家於百里因氏焉

綦連 代人號綦連部卽以為氏 其先姬姓六國末

避亂出保祁連山因以山為姓北人語譌故曰綦連冠軍 漢霍去病封冠軍侯因氏焉

廣武 漢李左車封廣武君因氏焉

第二 其先齊諸田漢武帝徙之諸陵以門秩次第田

廣之孫舊登為第二氏

第八 風俗通齊諸田後田廣弟英為八門因氏焉

太傅 漢太子太傅疏廣曾孫彥則避王莽亂於太原
因氏

呼延 呼衍氏入中國改為呼延氏

拓拔 黃帝子昌裔之後受封北土黃帝以土德王北
人以土為拓後授為拔故號拓拔氏孝文時改姓元
長孫氏出自拓跋鬱律生二子長曰沙莫雄次曰什翼

捷什翼捷卽後魏道武皇帝祖也後魏法七分其國
人以兄弟分統之沙莫雄為南部大人號為托跋氏
生嵩太尉北平宣王道武以嵩宗室之長改為長孫
氏至孝文以獻帝長兄為紇骨氏後改胡氏次兄普
氏為周氏又次兄為達奚氏改奚氏又次兄為伊婁
氏改為婁氏又次兄敦丘氏為丘氏又次兄侯氏為
萬俟氏魏官氏志侯氏後改為亥氏以上號七族叔
父之後乙旃氏為叔孫氏疏屬車焜氏改為車氏是

為十姓太和中詔自代北而徙者皆為河南洛陽人
代初有九十九姓後自十姓外餘部諸姓內入者凡
一百三十五氏太和十九年詔以穆陸賀劉樓于嵇
尉八姓同四姓其餘為姓為族有差若三世官不至
姓班有族官則入族官無族官則不入姓族

万俟後魏獻帝季弟後為十姓官氏志稱万俟氏

尉遲太原徵音與後魏同起尉遲部之後孝文時改

為氏

伊婁氏族志後魏獻帝與鄰第六弟為伊婁氏為十
姓

九百姓苑代郡有九百里為小吏

賀蘭有紇伏者與后夜俱起為賀蘭莫何弗因以為
氏

賀若代居元朔隨魏南遷北俗謂志正為賀若因以
為氏

賀拔下邳與後魏同出陰山代為長北人謂地為拔總

有其地土人相賀因氏焉

賀婁代人本居漠北以國為氏孝文改為婁氏

獨孤高平其先本姓劉氏至後魏在北有三十六部獨

劉不與因為氏

乙弗代人世統部落

斛律代人世為部落統帥號斛律部因氏焉

斛斯其先居廣牧世襲莫弗大人號斛斯部因氏焉

紇干代人孝文改為干氏

紇骨 後魏獻帝兄紇骨氏為十姓居代北

達奚 後魏獻帝第五弟之後為十姓

拓王 本姓王樂浪人遠祖羆後魏伏波將軍鎮武川
賜姓拓王氏

爾朱 爾朱榮北秀容人世為部落長其先居爾朱川
因為氏焉

屋引 本居元朔隨魏南遷孝文改為屋氏

素和 檀石槐之後後魏書以本白部故號素和孝文

改為和氏

叱羅 改為羅氏

叱努 改為狼氏

薩孤 代人隨魏南徙

是連 自代北隨魏南徙

可達 代北武川人隨魏南徙

叱利 一云叱列 西部大人後魏各依舊號

乞干 代人隨魏南徙

叱干 代人後魏獻帝定姓為叱干氏居武川

折婁 本鮮卑隨魏南徙

吐萬 代人世為部落帥

車焜 後魏獻帝命疏族為車焜氏繫十姓之列孝文
改為車氏

普氏 後魏獻帝次兄為普氏孝文改為周氏

乙旃 後魏官氏志獻帝命叔父之裔為乙旃氏是為

十姓

拔略 後魏官氏志拔略改為蘇氏

俟利 後魏足孤之後猶方伯也

溫孤 代人改為溫氏

足婁 改為婁氏齊神武后其女也

大蒙 姓纂今同蒲二州多此姓或改姓為憑

可頻 周書王雄傳太原人唐志代人涇州總管庸國

公西魏賜姓可頻氏生謙周益州總管

宇文氏世襲鮮卑大人至普回因獵得玉璽自以為天

授北俗謂天為宇璽為文因號宇文氏或云神農氏
為黃帝所滅子孫遁居北方鮮卑俗呼草為俟汾以
神農有嘗草之功因自號俟汾氏其後音訛遂為宇
文氏普回裔孫拔陵陵仕後魏都牧主開府儀同
三司安定忠侯以豪傑徙居代州武川縣生系仕至
內阿干二子韜阿頭韜三子肱顥泰泰乃後周太祖
也 庾信宇文顯墓誌公諱顯上黨武鄉人自大霧
浮河長虹映渚承源於若水纂系於蒼林上黨居韓

之西常山在趙之北因地為氏可略而言焉

三字姓

侯莫陳 後魏別部居庫斛真水周書云武川人世為
渠帥隨魏南遷號侯莫陳氏 庾信侯莫陳道生墓
誌本系陰山出自國族降及於魏在秦作劉

叱伏列 周書云代郡西部人其先為第一領人酋長
破六韓 其先代人隨魏南遷

可朱渾 世代北又居懷朔鎮隨魏南遷

步六孤 代北人孝文改為陸氏

丘穆陵 代人孝文改為穆氏

紇豆陵 代人孝文改為寗氏

莫多婁 代人隨魏遷洛陽

莫且婁 代人

莫侯盧 代人

莫那婁 代人

莫胡盧 代人孝文改為陽氏

譬歷辰代人改為張氏

四字姓

自死獨膊代人

井疆六斤代人

附

後魏遷洛有八氏十姓咸出帝族又有三十六族則諸國之從魏者九十二姓世為部落大人者並為河南洛陽人其中國士人則第其門閥有四海大姓郡姓州姓

縣姓及周太祖入關諸姓子孫有功者並令為其宗長
仍撰譜錄紀其所承又以關內諸州為其本望

唐太宗詔高士廉韋挺岑文本令狐德棻責天下譜牒
參考史傳檢正真偽進忠賢退悖惡先宗室後外戚退
新門進舊望右膏粱左寒賤合二百九十三姓千六百
五十一家為九等號曰氏族志而崔幹仍居第一太宗
欲以今日冠冕為等級高下遂以崔幹為第三姓班其
書天下高宗時許敬宗以不叙武后世又李義府恥其

家無名為子求婚不得更以孔志約楊二卿史元道呂才等十二人判定之裁廣類例合二百三十五姓二千二百八十七家四后遂居第一姓改為姓氏錄摺紳目為勲格義府奏悉索氏族志燒之又詔後魏太原王瓊與隴西李寶榮陽鄭溫范陽盧子遷盧澤盧輔清河崔宗伯崔元孫前燕博陵崔懿晉趙郡李楷凡七姓十家不得自為婚先是後魏太和中定四海望族以寶等為貴其後矜尚門地故氏族志一切降之王妃主壻皆取

當世勲貴名臣家未嘗尚山東舊族後房玄齡魏徵李
勣復與婚故望不減然每姓第其房望雖一姓中高下
懸隔其後袁宗洛譜昭穆所不齒者皆稱禁婚嫁益自
貴男女皆潛相聘娶訖不能禁云



山西通志卷六十四